

Samþykktir fyrir Héraðsnefnd Snæfellinga.

I. Heiti nefndarinnar, tilgangur og verkefni.

1. grein.

Heiti nefndarinnar er Héraðsnefnd Snæfellinga.
Starfssvæði nefndarinnar er Eyja- og Miklaholtshreppur, Helgafellssveit, Stykkishólmsbær, Grundarfjarðarbær og Snæfellsbær.

2. grein.

Tilgangur nefndarinnar er að annast sameiginleg málefni svæðisins og verkefni, sem varða öll aðildarsveitarfélögin og sveitarstjórnir fela henni.
Héraðsnefnd getur ályktað um hvert það efni, er hún telur varða svæðið og hagsmuni þess.

Verkefni nefndarinnar eru meðal annars eftirfarandi:

- Að kjósa eða tilnefna fulltrúa í nefndir, ráð og stjórnir sem Héraðsnefnd á fulltrúa í eða hún ákveður að starfi á sínum vegum. Fyrir þær nefndir sem starfa á vegum Héraðsnefndar skal setja reglugerðir. Kosnir / tilnefndir eru fulltrúar í eftirtaldar nefndir og ráð til fjögurra ára:
 - Þjóðlendunefnd,
 - Stjórn Byggðasafns Snæfellinga og Hnappdæla.
 - Breiðafjarðarnefnd Umhverfis- og auðlindaráðuneytis,
 - Fulltrúaráð Eignarhaldsfélags Brunabótafélags Íslands,
 - Búfjárefntirlitsnefnd sbr. gildandi reglugerð. Framkvæmdaráð Snæfellsness fer með málefni búfjárefntirlitsnefndar.
 - Umhverfissvottunarverkefnið Earth Check. Framkvæmdaráð Snæfellsness fer með málefni þess.
- Að fjalla um sveitarstjórnarmál, sem varða svæðið í heild svo og tillögur um hvað eina, sem verða má Snæfellingum til gagns og framfara og aðildarsveitarfélögin verða sammála um að fela nefndinni.

II. Stjórn, aðild, kjörgengi og fulltrúar í Héraðsnefnd.

3. grein.

Með stjórn nefndarinnar fara:

- Aðalfundur Héraðsnefndar
- Framkvæmdaráð Snæfellsness.

4. grein.

Aðild að Héraðsnefnd Snæfellinga eiga Eyja- og Miklaholtshreppur, Helgafellssveit, Stykkishólmsbær, Grundarfjarðarbær og Snæfellsbær og hafa öll þau sveitarfélög sjálfstæða aðild að Héraðsnefndinni.

Á fyrsta fundi að afloknum hverjum sveitarstjórnarkosningum skulu sveitarstjórnir kjósa fulltrúa í Héraðsnefnd til fjögurra ára. Kjörgengir eru aðalmenn og varamenn í sveitarstjórn og framkvæmdastjórn sveitarfélaga. Fulltrúar í framkvæmdaráði eru sjálfkjörnir í héraðsnefnd. Sé íbúafjöldi sveitarfélags innan við 200 íbúa kys sveitarstjórn einn fulltrúa í

Héraðsnefnd en tvo fulltrúa ef íbúar eru 200 - 500, en þrjá fulltrúa ef íbúafjöldinn er 501 - 1000, fjóra fulltrúa þegar íbúar eru 1001 - 1500 en fimm fulltrúa fyrir íbúafjöldann 1501 - 2500. Kjósa skal jafnmarga varafulltrúa. Kjörnir fulltrúar í sveitarstjórnnum eiga rétt til setu á fundum Héraðsnefndar án atkvæðisréttar.

III. Fundir, boðun, réttindi og skyldur héraðsnefndamanna

5. grein.

Héraðsnefnd skal halda fundi svo oft sem þurfa þykir, en þó eigi sjaldnar en einu sinni á ári. Skytt er formanni framkvæmdaráðs Snæfellsness að boða til fundar, ef þriðjungur héraðsnefndarmanna óskar þess.

6. grein.

Formaður framkvæmdaráðs Snæfellsness boðar fundi Héraðsnefndar og ákveður fundarstað og fundartíma í samráði við framkvæmdaráð Snæfellsness. Fundir Héraðsnefndar skulu boðaðir á tryggilegan hátt með dagskrá og minnst sjö daga fyrirvara.

Um boðun funda og fundarsköp Héraðsnefndar gilda ákvæði gildandi sveitarstjórnarlaga, eftir því sem þau eiga við. Sömu lög eiga við um réttindi og skyldur héraðsnefndarmanna.

Formaður framkvæmdaráðs Snæfellsness boðar fyrsta fund nefnda á vegum Héraðsnefndar.

7. grein.

Formaður framkvæmdaráðs setur fund, stjórnar umræðum og afgreiðslum á fundum Héraðsnefndar eða tilnefnir til þess fundarstjóra. Hann sér um að fundargerðir séu rétt færðar til bókar og skipar fundarritara.

8. grein.

Héraðsnefnd er því aðeins ályktunarfær, að meira en helmingur héraðsnefndarmanna sé mættur á fundinn. Við atkvæðagreiðslur ræður afl atkvæða. Séu atkvæði jöfn fellur málið, en við kosningar ræður hlutkesti milli þeirra sem jöfn atkvæði hafa.

Samþykki 2/3 hluta kjörinna fulltrúa þarf til að ákvarðanir Héraðsnefndar um fjárfestingar og stærri ólögbundin útgjöld og skuldbindingar öðlist gildi.

IV. Aðalfundur

9. grein.

Aðalfundur Héraðsnefndar skal haldinn fyrir lok marsmánaðar ár hvert. Þó skal aðalfundur haldinn fyrir lok júnímánaðar það ár sem sveitarstjórnarkosningar fara fram. Til aðalfundar skal boðað með sannanlegum hætti með minnst 2 vikna fyrirvara. Fundarefnis skal getið í fundarboðinu. Ef taka á til meðferðar á fundinum tillögur til breytinga á samþykktum nefndarinnar, skal greina meginefni þeirra í fundarboði.

Aðalfundur er löglegur ef löglega er til hans boðað og hann sækja að minnsta kosti helmingur kjörinna fulltrúa. Reynist aðalfundur ólögmaður, skal boðað til hans að nýju innan mánaðar, með 7 daga fyrirvara og þess getið í fundarboði að fundurinn sé haldinn í stað fyrri fundar og telst þá löglegur án tillits til fundarsóknar.

Verkefni aðalfundar eru;

- a) að fjalla um skýrslu Framkvæmdaráðs Snæfellsness

- b) að ákvarða árgjald sveitarfélaga til Héraðsnefndar,
- c) að ákveða þóknun vegna funda til stjórnarmanna og fulltrúa í nefndum á vegum Héraðsnefndar, þmt. akstur og uppihald
- d) að fjalla um reikninga og fjárhagsáætlun fyrir næsta fjárhagsár,
- e) að kjósa fulltrúa í nefndir og ráð,
- f) að Framkvæmdaráð Snæfellsness velji sér formann úr sínum hópi. Formaður Framkvæmdaráðs er jafnframt formaður Héraðsnefndar.
- g) að kjósa 2 skoðunarmenn ársreikninga og jafnmarga til vara,
- h) önnur löglega uppborin mál.

10. grein.

Formaður Framkvæmdaráðs Snæfellsness skal setja aðalfund og stjórna honum eða tilnefna fundarstjóra. Fundarstjóri kannar lögmati aðalfundar. Fundarstjóri skal láta kjósa fundarritara, sem skráir fundargerð. Í fundargerðarbók skal skrá ákvarðanir aðalfundar ásamt úrslitum atkvæðagreiðslna. Skrá um viðstadda fulltrúa skal færa í fundargerðarbók. Fundarstjóri og fundarritari skulu undirrita fundargerðina.

V. Framkvæmdaráð Snæfellsness

11. grein.

Framkvæmdaráð Snæfellsness skal skipað bæjarstjórum stærri sveitarfélaganna og oddvitum minni sveitarfélaganna. Framkvæmdaráð velur sér formann á aðalfundi héraðsnefndar. Framkvæmdaráð Snæfellsness fer með verkefni Héraðsnefndar milli aðalfunda. Formaður kemur fram fyrir hönd nefndarinnar, nema að hann ákveði annað. Framkvæmdaráð Snæfellsness er heimilt að fela öðrum aðila, eftir því sem henta þykir, ákveðin verkefni. Starfsmenn Héraðsnefndar og umhverfisvottunar eiga seturétt á fundum Framkvæmdaráðs Snæfellsness með málfrelsi og tillögurétt.

12. grein.

Meginverkefni Framkvæmdaráðs Snæfellsness eru:

- a) að fara með framkvæmda- og fjármálastjórn Héraðsnefndar.
- b) að hafa eftirlit með fjárreiðum Héraðsnefndar og undirbúa fjárhagsáætlanir hennar.
- c) framkvæmdastjórn Byggðasafns Snæfellinga og Hnappdæla
- d) að sjá til þess að skipulag og starfsemi Héraðsnefndar séu í góðu horfi,
- e) að ráða starfsmenn og setja þeim erindisbréf,
- f) að fylgjast með starfi nefnda Héraðsnefndar og setja þeim reglugerðir,
- g) að framfylgja samþykktum Héraðsnefndar.

13. grein.

Formaður boðar Framkvæmdaráð Snæfellsness til fundar og stýrir þeim. Skyld er að boða til fundar ef einn eða fleiri framkvæmdaráðsmenn óska þess.

Framkvæmdaráð Snæfellsness er ákvörðunarbært þegar meirihluti ráðsins sækir fundi. Halda skal gerðarbók um fundi framkvæmdaráðsins

14. grein.

Framkvæmdaráð Snæfellsness gerir tillögur að stefnumörkun Héraðsnefndar og hefur eftirlit með að starfsemin sé rekin lögum samkvæmt. Framkvæmdaráð Snæfellsness skal leggja drög að starfsáætlun Héraðsnefndar á komandi ári og setja hverjum þætti í starfi hennar rekstrarmarkmið.

VI. Framkvæmdastjórn

15. grein.

Framkvæmdaráð Snæfellsness annast framkvæmdastjórn Héraðsnefndar. Nefndinni er heimilt að ráða starfsmann. Framkvæmdaráð Snæfellsness ákveður hver skuli annast fjárreiður og bókhald Héraðsnefndar.

VII. Reikningar, endurskoðun og fjármál.

16. grein.

Starfsár Héraðsnefndar og reikningsár er frá 1. janúar -31. desember ár hvert. Framkvæmdaráð Snæfellsness semur á hverju ári ársreikning, sem hefur að geyma ársskýrslu, rekstrarreikning og efnahagsreikning. Ársreikningur skal gerður að góðri endurskoðunarvenju, er varðar mat á hinum ýmsu liðum, uppsetningu, sundurliðun, skýringar og heiti liða.

Í ársskýrslu skal gefa upplýsingar, sem eru mikilvægar við mat á fjárhagslegri stöðu Héraðsnefndar og afkomu á reikningsárinu, sem ekki koma fram á efnahags- og rekstrarreikningi eða í skýringum með þeim. Þetta á einnig við um mikilvæg atriði, sem fram hafa komið eftir lok reikningsársins. Þá skal ársskýrslan einnig gefa upplýsingar um fjölda starfsmanna á reikningsárinu.

Ársreikningurinn skal vera í samræmi við lög um hlutafélög. Gerð ársreiknings skal lokið í síðasta lagi 2 vikum fyrir aðalfund ár hvert og hann þá afhentur skoðunarmönnum til skoðunar.

17. grein.

Tekjustofnar Héraðsnefndar eru þessir:

- a) tekjur af eignum,
- b) lögboðin framlög ríkis og sveitarfélaga til einstakra verkefna sem undir Héraðsnefnd heyra,
- c) sala á þjónustu,
- d) framlög sveitarfélaga skv. 18. grein.

18. grein.

Framlög sveitarfélaganna, skiptast eftir íbúatölu þeirra 1. janúar ár hvert og ákvarðast framlagið á aðalfundi Héraðsnefndar. Framlagið er greitt með 1 greiðslu fyrir 1. apríl. Verði dráttur á greiðslum frá sveitarfélögum, skulu reiknaðir af þeim dráttarvextir frá gjalddaga.

19. grein.

Sveitarsjóðir aðildarsveitarfélaga bera einfalda ábyrgð á skuldbindingum Héraðsnefndar.

VIII. Breytingar á samþykktum

20. grein.

Til breytinga á samþykktum þessum þarf samþykki 2/3 hluta héraðsnefndarmanna á aðalfundi, nema um sé að ræða breytingu sem leiðir af breyttri löggjöf. Tillögur um breytingar á samþykktum skal getið í fundarboði.

IX. Slit á Héraðsnefndarsamstarfi.

21. grein.

Með tillögur um slit á samstarfinu skal fara sem um breytingar á samþykktum þessum, hið sama á við um hvers konar samruna eða sameiningu nefndarinnar við aðrar nefndir og um sölu á öllum eignum þess.

Héraðsnefndarfundur, sem tekið hefur löglega ákvörðun um að slíta samstarfinu skal ákveða hvort skiptaréttur eða skilanefnd, kosin á fundinum skuli stýra skiptunum.

X. Gildistaka.

22. grein.

Samþykktir þessar taka strax gildi og koma í stað eldri samþykpta sem falla þar með úr gildi.

Samþykkt á stofnfundi 30. september 1989.

Breytingar samþykktar á aukaaðalfundi 14. apríl 1996.

Breytingar samþykktar á aðalfundi 5. mars 2008.

Breytingar samþykktar á aðalfundi 21. mars 2012.

Breytingar samþykktar á aðalfundi 16. apríl 2013.